


Dibuundu Yina

Me Vunama, Na Yinza

 Yesu Klisto, Mwana na Yandi, pesaka na beto bima nionso ya ofele kati na Klisto. Beto ke tonda Nge, Mfumu, samu na mambote yina me pesama na beto na nzila ya Munkayulu yayi ya nene ya Calvaire, ti yawu vutulaka beto na ngwisani mpe na mambote na Nge, ti beto lenda vwanda na kiese yayi na ntima na kuzabaka ti yawu me sonamaka ti, “Kana beno zinga na Munu, mpe Bandinga ya Munu kele na kati na beno, beno lenda lomba nionso yina beno zola, mpe beno ke baka yawu.” Ntangu yayi, beto ke tonda nge samu na yawu, mpe beto ke sambila ti Nge ke pesa beto lukwikilu na kukwikila yawu na nionso yina kele na beto.

² Ntangu yayi bika beto katula, Mfumu, konso mpasi ya kilumbu, konso souci ya luzingu yayi, bisika nionso kubanda na sinzidi tii na pasteur, ti ke vwanda diaka ve na kima mosi na mabanza ya beto ntangu yayi, kasi beto vingila, beto widikila na luzitu nionso Mpeve-Santu kutuba na beto, ti beto lenda lungisa kima mosi ya mbote, kuzaba mingi samu na Nge, na kimvuka ya beto. Samu, Mfumu, ya kieleka kikuma yawu yina beto me kwisila na kilumbu yayi ya mwini ya ngolo. Tuba na beto na nzila ya Ndinga ya Nge ya moyo, mpe bika ti Ndinga ya moyo kukota na kati ya beto mpe kuzinga na kati ya beto, ti beto lenda yilama mpe longama, samu na yinza ve, kasi kusoba ya malu-malu ya mpeve ya beto, na kifwanisu ya Mwana ya Nzambi. Oh, bantima ya beto ke tekita na mabanza, mpe kiese me fuluka na mioyo ya beto, na kuzaba ti beto lenda bokilama bana ya babakala mpe bana bakento ya Nzambi. Beto ke zinga pene-pene ya Kwizulu na Yandi ya zole, mpe bayinsi nionso mpe bimfumu nionso ke tekita na nsi ya makulu ya beto, bima nionso ya yinza ke vila, kasi na kuzabaka ti kilumbu mosi Yandi ke kwisa mpe ke baka beto samu na Kimfumu yina ke vwanda na nsuka ve, to, yawu ke nikana ata fioti ve. Mpe kubanza ti beto ke binama ya Kimfumu yina ntangu yayi! O Nzambi, sala nzengolo ya bantima na beto mpe makutu na beto bubu yayi, na—na Mpeve-Santu, na nzila ya kusukula masa ya Ndinga. Samu beto ke lomba yawu na Nkumbu ya Yandi mpe samu na nkembo ya Yandi. Amen.

³ Mu zola finama na yintu ya dilongi na suka yayi. Mpamba ve, mu zolaka tubila kima mosi ya mwa luswaswanu kana kisalu ya kubeluka ya nzutu vwandaka, kasi beto zabisaka na ntwala ti bakalati ya bisambu kupesama na ntangu nana, tii na ntangu nana na bamuniti makumi tatu to na ntangu yivwa. Mpe munu baka . . . Billy kwisaka na yinzo bamuniti fioti me luta mpe yandi

tubaka ti muntu vwandaka awa ve, yawu yina yandi kabulaka ve bakalati ya bisambu. Na yawu beto ke . . . mu banzaka na kutubila masonuku yayi, samu na kusungika dibuundu. Mpe mu zola tubila yintu ya dilongi yayi: *Dibuundu Yina Me Vunama, Na Yinza*. Mu zola tanga ndambu ya masonuku na ntangu yayi kuna na Buku ya ba Juges, na kapu ya 16, kubanda na nzila ya 10.

Mpe Delila tubaka na Samson, Tala, nge me sakana na munu, mpe nge me tuba na munu baluvunu: ntangu yayi tuba na munu, mu ke bondila nge, wapi sika ngolo ya nge me bumbanaka.

Mpe yandi tubaka na Delila ti, kana beno kanga munu bansinga ya malu-malu yina bawu me sadilaka ntete ve, na yawu mu ke lemba, mpe mu ke kuma mutindu muntu nionso.

Na yawu Delila bakaka bansinga ya malu-malu mpe kangaka yandi na yawu, mpe tubaka na yandi, Ba Phillistin ke na zulu ya nge, Samson. Mpe bantu vwandaka ya kuswama na kati ya suku. Mpe yandi zengaka bansinga yina vwandaka na maboko ya yandi mutindu bwanda.

Mpe Delila tubaka na Samson, Tala, nge me sakana na munu diaka ntangu yayi, mpe nge me tuba na munu baluvunu: tuba na munu wapi ngolo ya nge me bumbanaka. Mpe yandi tubaka na Delila, Kana beno tunga . . . mikoto sambwadi ya bansuki ya yintu ya munu, na bwanda.

Mpe yandi bakaka mikoto sambwadi ya bansuki ya yandi mpe kangisaka yawu na mutunga, mpe tubaka na yandi, Ba Phillistin ke na zulu ya nge, Samson. Mpe yandi pamukaka na mpongi ya yandi, mpe tinaka ntama na mutunga, na mpwasa.

Mpe Delila tubaka na yandi, Yinki mutindu nge lenda tuba ti, nge zola munu, na ntangu nge ke zola munu ve na kati ya ntima ya nge? nge me sakana na munu mbala tatu yayi, mpe nge me . . . tuba na munu baluvunu wapi sika kele ngolo ya nge; mpe nge me tuba na munu ve wapi sika kele ngolo ya nge.

Mpe yawu salamaka ti, na mutindu Delila vwandaka yangisa yandi konso kilumbu na bandinga ya yandi, mpe ndimisaka yandi, mpamba ve ti moyo ya yandi kumaka na mpasi ya lufwa;

Mpe Samson tubaka na yandi nionso yina vwandaka na ntima ya yandi, mpe tubaka na yandi ti, lutebo ke kwisaka ve na zulu ya yintu ya munu; samu mu me pesamaka na Nzambi kubanda kivumu ya mama ya munu: kana mu zengisa bansuki, na yawu ngolo ya

munu ke basika, mpe mu ke lemba, mpe mu ke kuma mutindu muntu nionso.

Mpe na ntangu Delila monaka ti yandi tubaka na yandi nionso yina vwandaka na ntima ya yandi, yandi tumaka bawu bokila. . . bamfumu ya ba Phillistin, na kutubaka, beno kwisa, samu yandi me zibula na munu ntima ya yandi. Mpe bamfumu ya ba Phillistin kwisaka na yandi, mpe sosaka mbongo, to natilaka yandi mbongo.

Mpe Delila bwisaka yandi na mpongi na zulu ya mabolongo ya yandi; mpe yandi bokilaka bakala mosi, mpe yandi zengaka Samson bamikoto sambwadi ya bansuki ya yintu ya yandi; mpe. . . bandaka na kuniokula yandi, mpe ngolo ya yandi basikaka na yandi.

Mpe yandi tubaka, Ba Phillistin ke na zulu ya nge, Samson. Mpe yandi pamukaka na mpongi, mpe tubaka, mu ke nunga mutindu bambala yankaka na ntuala, mpe mu ke tina. Mpe yandi banzaka ve ti MFUMU yambulaka yandi.

- 4 Ntangu yayi mu zola tanga, samu na masonuku ya yintu ya dilongi yayi, na Buku ya Revelation, kapu ya 2, kubanda na nzila ya 21 mpe na nzila ya 23.

Mpe Mu pesaka yandi ntangu ya kubalula ntima samu na pite ya yandi; mpe yandi zolaka ve na kubalula ntima.

Tala, Mu ke losa yandi na mbeto, mpe ke tinda bampasi na bayina nionso ke salaka pite na yandi, kaka kana bawu balula ntima samu na mambu ya bawu ya yimbi.

Mpe Mu ke fwà bana ya yandi na lufwa; mpe mabuundu nionso ke zaba ti Mu kele yina ke zabaka binsweki ya ba rein mpe bantima: mpe Mu ke futa beno na kulandaka bisalu na beno.

Bika Mfumu kuyika masakumunu ya Yandi na kutanga ya Ndinga ya Yandi.

- 5 Samson, bandaka mbote, mutindu mosi na dibuundu. Yandi bandaka na nzila ya mbote. Yandi bandaka mbote, mpe bokilamaka bakala ya lukumu ya ngolo mingi. Yandi bandaka, na kusadila Mfumu, na kuzitisa Bandinga ya Yandi mpe ba Misiku ya Yandi. Mpe yina ke fioti mutindu mosi dibuundu. Yawu bandaka mbote, mutindu beto lenda tuba, na nzonzolo ya yinza, yandi bandaka na lweka ya mbote. Yawu bandaka na kuzitisa ba Misiku ya Mfumu. Mpe na ntangu nionso Samson landaka Mfumu, Mfumu sadilaka Samson.

- 6 Na yawu, Nzambi lenda keba konso muntu yina mpe kusadila konso muntu yina ke landa Yandi, samu yawu ke kusalu

ya Nzambi. Kasi na ntangu yina beto ke baluka na lweka, ntama ya bima ya Nzambi, na yawu Nzambi lunga sadila beto ntangu ya yinda ve. Na ntangu beto ke landa Misiku ya Nzambi, na ntangu beto ke bikala na kati ya matiti ya Biblia mpe ke sambila na Ndinga yina me sonamaka, beto ke sambila Yandi na Mpeve mpe na Kieleka ya Ndinga, na yawu Nzambi lenda sadila konso muntu yina. Kasi na ntangu bawu ke baka mazaya ya kubaluka na lweka ya kima yankaka, na yawu Nzambi lunga sadila muntu yina ntangu ya yinda diaka ve.

⁷ Na yawu, Samson ke kifwanisu ya kulutila nene ya dibuundu ya bubu yayi. Na ntangu dibuundu bandaka, Nzambi lendaka sadila dibuundu, samu dibuundu tambulaka na bukebi ya Misiku ya Mfumu, zitisaka balukanu ya Yandi mpe ndiatulu ya Yandi, mpe sadilaka Misiku ya Yandi nionso. Mpe Nzambi vwandaka na dibuundu. Kasi yawu ke monana ti kele na kisika ya kulemba mingi na kati ya dibuundu.

⁸ Bambuka moyo, beto kele na kisika ya bansaka ve, kasi beto kele na kisika ya mvita. Bantu mingi ke banza ti na ntangu bawu me kuma Baklisto ti yawu yina kaka bawu lunga sala, ti yina ke vwandisa yawu kukonda nsuka, mutindu bawu ke Baklisto ti konso kima ke tambula kaka mbote. Kubanza yina ata fioti ve na yintu na beno. Mpamba ve, mu me kuma Muklisto samu na kunwana, kunwana mvita ya mbote ya lukwikilu. Mu me kuma Muklisto, samu na kukota na ndonga ya mvita. Beto kele basoda ya Baklisto, mpe beto ke longuka mpe ke baka mayele, mpe beto zaba bamayeke nionso ya mbeni, kuzaba yinki mutindu kubaka kikesa, kuzaba mutindu ya—ya kunwana mvita. Mpe beto lenda sala yawu kaka mutindu Mpeve-Santu ke monisa yawu na beto. Beto lunga baka ve mabanza ya yinsi yankaka samu na kutuba na beto na ntangu beto ke kwenda na mvita, kubaka mwa mabanza ya bawu. Kasi beto lunga baka mabanza ya beto mosi, mutindu Mpeve-Santu lenda twadisa beto, mpe yinki mabanza Yandi lunga pesa beto, samu Yandi kele Kapita ya Misiku ya makesa ya Baklisto.

⁹ Samson salaka mbote, yandi vwandaka muntu ya nene tii kuna yandi bandaka, bandaka (mutindu beto lunga bokila yawu) na kusala nsaka pene-pene, tii kuna yandi bandaka na kubasika na kizunga na yandi. Mpe dibuundu tambulaka mbote, mpe vwandaka mbote tii na ntangu bawu bandaka na kubasika na kizunga na bawu. Samson bandaka na kusala nsaka. Mpe yandi vwandaka sala nsaka na bana bakento ya Israel ve, yandi bandaka na kusala nsaka na bana bakento ya Phillistine.

¹⁰ Mpe yina ke mutindu mosi na yina dibuundu salaka. Yawu bandaka na kuzola na kati ya bantu ya yandi mosi ve, yandi zolaka bamimpani. Yina ke sika wapi beto salaka kifu yina ya nene, mpe mosi ya kulutila nene ya bifu, kele na ntangu dibuundu bandaka na kusala bima yina vwandaka mbote ve.

Yawu bandaka na kukeba, bankundi ya yimbi, mutindu mosi Samson.

¹¹ Samson, na ntangu nionso yandi vwandaka na kimvuka ya bantu ya Mfumu, yandi vwandaka mbote mingi. Kasi na ntangu yandi bandaka na kusakana na bankundi ya yimbi, na yawu yandi kotaka na mpasi.

¹² Mpe yina ke mutindu mosi dibuundu. Na ntangu dibuundu landaka na luzitu nionso mpe konso kilumbu lutwadusu ya Mpeve-Santu, Nzambi sakumunaka bawu, mpe bimangu mpe bidimbu mpe mambu ya ngitukulu landaka dibuundu. Kasi na ntangu yawu bandaka na kukeba bankundi ya yimbi, na yinza! Mosi ya mambu ya kulutila yimbi yawu salaka, mpe bima ya ntete yawu salaka, yawu bandaka na kusala organisation, na kuzenga ngwisani na bakwikidi yankaka, samu bawu monaka ti bayinsi vwandaka na ba organisation. Kasi Nsangu ya mbote yayi ya kitoko tumamaka ve na yinsi mosi to bantu ya mutindu mosi kaka. Yawu me pesama na “konso muntu yina me zola, bika yandi kwisa,” na bayinsi nionso, bamakanda nionso, bandinga nionso, mpe bantu nionso. Nzambi me bakaka ntete ve dibanza ya kumona beto ke sala bikaku.

¹³ Kasi bantu zola kuvwanda mutindu yina, bawu ke fwanikisa, to ke mekula, ke sala mutindu yinza ke sala, ke tuba mambu ya mutindu mosi na bawu, kuvwanda na lunungu mutindu mosi na bawu. Beto lenda vwanda na lunungu ata fioti ve na ntangu beto ke sala konso kima yina yinza ke sala. Beto lenda vwanda kaka na lunungu na ntangu beto ke landa misiku ya Nzambi mpe mutindu ya Yandi ya kusala mambu. Beto lenda vwanda ata fioti ve na lunungu, na yinza. Kana compagnie ya makaya bakaka lunungu ya bawu ya nene na television, mpe bantu ya biere mpe bantu ya whisky bakaka lunungu na bawu ya nene na nzila ya television, yina ke kidimbu ve ti dibuundu ke kuzwa lunungu ya yandi na television. Lunungu ya dibuundu kele kaka na kulonga ya Nsangu ya mbote, na Ngolo ya Nzambi, mpe na kumonisama ya Mpeve. Beto lenda tuba ti television salaka *yayi mpe yina* mpe compagnie ya makaya mpe—mpe ba compagnie yankaka! Beto kele na Disonuku mosi ve samu na kumeka kudifwanikisa na bantu na bawu. Mpe na ntangu nionso beto ke sala yawu, beto lenda vwanda na bantu mingi, kasi yina kele ve yina Nzambi tindaka beto na kusala. Beto ke banza ti samu bima nionso ke tambula mbote, beto ke pamuka na zulu, beto ke na ba organisation ya nene, beto ke sala ti bima ya nene ya ke sema kusalama, ti yawu kele lunungu. Lufwa ke kota na kati ya beto konso kilumbu, na kimpeve! Kana beto vwandaka bantu million kumi na suka yayi, mpe kukonda Mpeve Santu kati ya beto, kulutila mbote beto vwanda bantu kumi na Mpeve-Santu na kati ya beto. Beto lunga kukifwanikisa na yinza ve.

¹⁴ Mpe kima ya ntete, vwandaka, dibuundu bandaka na kudiyika yawu mosi. Organisation ya ntete vwandaka dibuundu

ya Catholique, mpe na yawu kwisaka dibuundu ya Luther. Na ntangu dibuundu ya Catholique vukanaka samu na kusala organisation, kuboka mosi wakanaka kilumbu mosi, “ba Phillistin ke na zulu na nge, Samson,” mpe Samson zengaka bansinga ya dibuundu ya Catholique, mpe Martin Luther kwisaka kuna, na ba organisation.

¹⁵ Na yawu bawu kangaka dibuundu na nsinga yankaka, mutindu Delila salaka. Mpe bawu bandaka . . . na kisika ya kuvwanda na muntu yina me bokilama na Nzambi, muntu yina me bokilama na Mpeve-Santu; ziku bawu zabaka ve yina kele ABC na bawu, kasi bawu zabaka Klisto. Na yawu dibuundu bakaka mvwatu ya kitoko, mpe yidikaka mvwatu ya bawu na kulandaka bantu ya politique. Mpe bawu lungaka pesa balongi na bawu “diplome ya docteur,” konso muntu zola vwanda Docteur na Théologie. Yina vwandaka nsinga yankaka samu na kukanga dibuundu. Bantu ke kwenda mpe ke longuka, konso seminere ke meka na kubasisa muntu ya kulutila mbote yina me tangaka mingi na mutindu ti mabuundu na bawu lenda tuba na lulendo ti, “Pasteur na beto kele Docteur na Théologie.” Mpe yinki bawu salaka? Mosi ke meka kuvwanda na mazaya ya kulutila yina yankaka. Mbote, yina zola tuba ve ti konso kima kele na ntwala ya Nzambi.

¹⁶ Mpe yawu kele na nsatu ya muntu ve na kumeka kubaka mazaya ya yandi ya yinza mpe kusepelisa Nzambi na yawu. Yawu kele mvindu na ntwala ya Nzambi! Nge lenda yangidisa Nzambi ata fioti ve na mabanza ya yinza mpe mazaya ya yinza, samu “yawu kele na kimbeni na Nzambi,” Masonuku ke tuba yawu. Yandi lunga sala yawu ve.

¹⁷ Mpe konso muntu ke meka kuvwanda na mazaya mingi. Bawu zaba kaka yinki kusala mpe bandinga ya kutuba, mpe yawu me kuma kaka nzonzolo ya politique na kisika ya kumonisama ya ngolo, ya Nsangu ya Mpeve-Santu yina ke kota na ntima ya muntu mpe ke zaba masumu ya yandi. Bawu me longama na bamasolo ya politique, mpe beto kele na nsatu ya mambu yina ve. Paul tubaka, “Ndinga kwisaka na beto, kaka ve. . . to, Nsangu ya mbote, na Ndinga kaka, kasi na Ngolo mpe kumonisama ya Mpeve-Santu.” Yina nataka Nsangu ya mbote, na kumonisa bangolo ya Mpeve-Santu! Kasi na nionso yayi muntu ke kwenda na nswalu nionso na seminere mpe bawu mpe ke longuka malongi ya nene, yinki mutindu bawu lunga telema na ntwala ya bantu, wapi mutindu bawu lenda kukitendula bawu mosi, yinki mutindu bawu lunga lwata mpe yinki mutindu bawu lunga sala mambu, bawu lunga sadila ata fioti ve grammair ya yimbi. Ntangu yayi, nionso yina kele mbote samu na nzonzolo ya politique, kasi beto ke landa ve bandinga ya muntu. Paul tubaka, “Nsangu ya mbote yina mu longaka kwisaka mutindu yina ve, kasi Yawu ke kwisa na nzila ya lubutuku ya malu-malu ya Mpeve-Santu mpe kumonisama ya

Ngolo.” Yawu ke kwisa ve na malongi ya nzonzolo ya kitoko, na mutindu mayele na beno lunga vwanda, to kivuvu ya nge lunga vwanda na mayele ya muntu mosi. Kasi yawu ke kwisa na nzila ya kumonisama ya Ngolo ya Klisto yina vumbukaka na lufwa. Yina ke Nsangu ya mbote, “Kuzaba Yandi na Ngolo na Yandi ya mvumbukulu.”

¹⁸ Konso muntu ke meka na kubanza tí yandi ke mwa muntu ya mayele kulutila muntu yankaka, konso denomination. Ba Methodiste ke tuba, “Beto ke na muntu ya kulutila mayele.” Ba Baptiste ke tuba mutindu yina, mpe dibuundu ya Klisto, mpe nionso yina, bawu nionso, “Beto, beto ke ya kulutila mayele. Beto, bantu ya beto—ya beto, beto ke pesaka muswa na muntu nionso ve na kubasika mpe kulonga Nsangu ya mbote.” Kasi bawu ke soola bawu. (O Nzambi, wà mawa!) Ke soola bawu; kana bawu ke na kati ya buku mosi ya malongi na bawu, na yawu bawu ke kotisa bawu na kati ya dibuundu. Nzambi lenda sadila yandi ata fioti ve. Mu ke zola muntu yina me soolama na Mpeve-Santu na kulonga munu, Nzambi yina vumbukaka na lufwa, yina soolamaka ve na muntu to na ba denomination.

¹⁹ Mazaya nionso! Bawu ke tuba, “Oh, beto zaba nionso yina me tadila Yawu,” mpe bayankaka kuzaba ve alphabet ya Mpeve-Santu. Bawu ke manga Yawu.

²⁰ Yawu ke bambuka munu moyo ya mwa buku yina mu tangaka kilumbu mosi na Californie, bamvula kumi me luta. Mu lokotaka yawu na kati ya yinzo mosi ya nkulu ya babuku. Mu me zimbana nani vwandaka nsoniki ya yawu. Kaka mwa buku mosi ya matiti nkama mosi na kumi, kasi yawu vwandaka na mwa mambu ya mbote na kati ya yawu ata ti yawu monanaka ya nsaka kasi yawu vwandaka ya ngangu. Kasi, mu monaka kima mosi kuna na kati yina monanaka mutindu Nzambi, samu na munu. Mpe mosi ya mwa masolo bandaka kuna mutindu yayi. Na suka mosi na yinzo ya bansusu, vwandaka na mwa nsusu mosi ya bakala yina banzaka ti yandi vwandaka na mazaya nionso. Na yawu yandi pamukaka na zulu ya sanduku mpe bulaka mwa yinwa ya yandi na zulu ya sanduku, mbala yiya to tanu, losaka mwa yintu ya yandi na manima mpe yimbaka na mutindu beno me wakà ntete ve nsusu ya bakala kuyimba. Mpe bayankaka, yandi bendaka bukebi na bawu, mpe yandi tubaka, “Bakento mpe babakala ya yinzo ya bansusu yayi, mu zola tuba na beno na suka yayi samu na yina me tadila manaka nionso ya malongi yina beto me soola.” Yandi tubaka, “Mu lombaka mazaya mingi na malongi ya munu,” mutindu yandi bendaka mwa bamaneti na zulu ya yinwa ya yandi. Mpe yandi tubaka, “Mu bakaka lukanu ti beto bansusu lunga vwanda beto mosi na mazaya ya mingi. Mpamba ve, mu lunga tuba na beno sika wapi, kana beto timuna mpe sala lupangu mosi kuna to dibulu mosi, beto ke kuzwa vitamine mosi yina ke sala ti beto yimbila mbote-mbote, na mansala ya kitoko mingi. Mpe, oh, mu lunga tuba na beno

wapi mutindu beto ke yimbila mbote mingi na mutindu mingi ya luswaswanu.”

²¹ Mpe ba mwa bansusu na mwa ba crête ya bawu ya mbwaki, yimbilaka mpe tubaka, “Yandi kele cheri ve?” Mpe ya kieleka bawu sepelaka na yandi. “Oh, yandi ke nsusu mosi ya kulutila mayele!” Ya ke bambuka munu moyo ya mwa malongi yayi ya seminere. “Muntu ya mayele mingi! Beto ke na nsatu ve ti beto bikala na bansusu yina yankaka, beto lunga landa yandi kaka.”

²² Mbote, na ntwala mwa nkundi yayi kubaka ndinga na yandi, vwandaka na mwa nsusu yankaka yina vwandaka ve na mutindu ya mansala ya kitoko, yandi kwisaka nswalu na kati ya mwa lupangu ya bansusu, mpe tubaka, “Bantwenia ya babakala, kaka muniti mosi! Munu waka kaka nsangu ya nsuka na radio. Bansusu kwendaka na bitamina nkama yiya ya kitesilu, mbasi beto nionso ke kwenda na abattoire! Yinki mbote mazaya na beno ke sala?”

²³ Mpangi, mazaya nionso yina beto lunga kotisa, wapi mbote yawu ke sala? Beto kele mvindu mbala sambwadi! Beto nionso ke fwá na mwa bantangu fioti mpe na mwa baminuti fioti. Mazaya ya beto zola tuba kima mosi ve. Beto zola zaba Yandi. Kasi bawu ke salaka mutindu yina.

²⁴ Mutindu mu bakulaka yawu na ntangu fioti me luta na yina me tadila mwa ndeke yayi canarie, mpe yandi banzaka ti yandi vwandaka na mazaya nionso yina—yina lunga vwanda, mpe yandi zabaka mingi na mutindu ti yandi lungaka tuba na ba canarie yankaka yina me tadila bantu. Na yawu yandi pamukaka na zulu ya lupangu na yandi mpe yandi bandaka na kutuba yina me tadila muntu, yinki yandi zaba samu na bawu. Mpe, na ngitukulu nionso, longi mosi ya Purdue mataka mpe bandaka na kutuba na yandi mwa bandinga ya kitoko, mpe mwa nkundi yayi bwetaka meso na yandi mpe balulaka yintu na yandi mpe. . . . Ntangu yayi, yandi vwandaka na meso, yandi lungaka mona longi. Yandi vwandaka na makutu, yandi lungaka kuwa yandi. Kasi, ya kieleka, yandi zabaka ve yina yandi vwandaka tuba. Samu na yinki? Yandi kele na butomfo ya canarie. Yandi kele kaka na butomfo ya ndeke. Yawu yina kaka yandi ke na yawu. Yandi ke na butomfo ya kimuntu ve, na yawu yandi lunga banza ve mutindu mosi na bantu.

²⁵ Mpe ata muntu mosi ve lunga banza mutindu mosi na Nzambi! Nge kele muntu, mpe mazaya nionso ya yinza kele ya kulutila butomfo ya canarie ve. Nionso ya beno ke sala, beno ke kukipesa mpasi beno mosi. Beno vwanda kaka na mabanza ya Klisto.

²⁶ Kikuma ya bantu ke kwenda mpe ke kota na ba organisation, mpe ke soba lubutuku ya mbala zole na mbote, bawu ke tina lubutuku ya mbala zole. Bawu zola lubutuku ya mbala zole ve. Mpe bawu—bawu zaba ti beto ke longaka yawu na Biblia, na

yawu bawu zola soba kima mosi na yawu. Mpe ba Pentecôtiste kele kaka na yimbi, bawu ke meka na kusoba kima mosi! Bawu zola yawu na kalasi. Yawu lunga vwanda kaka na mutindu ya kalasi, “Beto ke pesa mbote mpe ke kota na dibuundu, mpe kulosa masa na zulu ya yintu to kubotika,” to kima mosi. Bawu ke na boma ya lubutuku ya mbala zole. Na bantangu yankaka mu ke kwikila ti Branham Tabernacle ke vwanda na boma na yawu!

²⁷ Ntangu yayi, beto nionso zaba mbote yinki yayi kele lubutuku, mu ke tala ve sika wapi yawu kele, to wapi, konso sika yina yawu kele, yawu kele kaka mvindu. Ata ti bébé me butuka na zulu ya matiti ya masangu, na zulu ya mesa ya ngolo, to na kati ya hôpital ya bintutu ya kitoko, yawu kele kaka mvindu, ata yinki mutindu. Lubutuku ya mwana ya ngombe, lubutuku ya konso kima yina yankaka, kele kaka mvindu.

²⁸ Mpe lubutuku ya mbala zole kele kaka kima mosi ya mvindu! Kasi bantu kele ya kifuluka na amidon, “Beto ke kwenda kuna ba ke pesaka mbote. Beto ke kwenda kuna bawu ke bokaka ve mpe ke dilaka ve, mpe ke bula na autel mpe ke boka.” Beno zola vwanda na kimuntu mingi! Yina beto kele na yawu nsatu kele lubutuku, lufwa, yina ke nata diaka Luzingu!

²⁹ Mbuma, mbála ya nkulu, mbuma ya mbála, beno baka mbála yina mpe beno kotisa yawu na kati ya ntoto. Kuna beno lunga baka bambála ya malu-malu, mbála yina ya nkulu ke pola. Disangu lunga basisa luzingu ya malu-malu ve tii kuna yawu ke pola.

³⁰ Mpe bakala to kento lunga ata fioti ve kubaka lubutuku ya mbala zole tii kuna mayele ya bawu ya kimuntu mpe ki-bawu mosi ke pola, ke fwa, ke fwa na autel, mpe kudila, kubaka mvwanzi nionso, sika wapi amidon ke basika na col na beno, mpe beno ke butuka diaka na Mpeve ya Nzambi. Mu ke tala ve kana beno ke boka, ke tuba bandinga ya malu-malu, ke pamuka na zulu mpe na nsi, ke nikana-nikana mutindu nsusu ke matisaka yintu na yandi, beno me bokilama na Luzingu ya malu-malu! Kasi beto sobaka yawu na kima mosi, beto zola mutindu ya luswaswanu, ya kieleka.

³¹ Kilumbu yankaka, na Kilumbu ya tanu, kento ya munu mpe munu mosi vwandaka kwenda na magasin. Mu zola vutukila yayi ve. Kasi mutindu beto vwandaka kulumuka na bala-bala, mu vwandaka kukikeba na kubalula yintu ya munu na lweka yina yankaka, bakento vwandaka kinkonga. Mu silaka na Nzambi na ntangu munu vwandaka kifwa-meso, kana Yandi lunga belusa munu meso mu lungaka tala kaka kima ya mbote. Mpe mu ke na mwa kulunsi mosi ya kutelemisa na kati ya voiture ya munu. Na ntangu mu ke mona kima ya mutindu yina, mu ke tala na kulunsi mpe ke tuba, “O Nzambi, Yina ke Kisika na munu ya kuswama,” na yawu mu ke tala na kulunsi.

³² Mu monaka bakento yina. Meda tubaka, “Beto me mona kento mosi ve yina me lwata jupe bubu yayi.” Mpe yandi tubaka, “Bill, tala kento yina na mwa ba bretelle na zulu ya nzutu na yandi,” mpe tubaka, “nge zola tuba na munu ti kento yina kuzaba ve ti yina kele mbote ve?” Yandi tubaka, “Kana yandi zaba ve ti yawu kele mbote ve, na yawu yandi kele na nganda ya mabanza na yandi ya mbote.”

³³ Mu tubaka, “Kaka muniti mosi, cherie. Yandi kele muntu ya Amerique, yandi ke sala mutindu bantu ya Amerique ke salaka.” Mu tubaka, “Mu vwandaka na Finlande ntama mingi ve, cherie.”

³⁴ Mpe mu yufulaka muntu mosi kuna yina pesaka munu sika ya kuvwanda, Docteur Manninen. Mpe beto kwendaka sukula masa ya mavimpi, yina me bokilama “sauna,” mpe bawu ke kotisa beno na kati mpe ke losila beno masa ya tiya, to masa na zulu ya matadi ya tiya, mpe yawu ke tokisa beno. Na yawu bawu ke losa beno na masa ya madidi, mpe beno basika. Na yawu bawu ke nata beno na kisika mosi, mpe kele na ba minganga kuna na kati, bakento ke nika babakala (mpe bawu kinkonga), ke tinda bawu na manima kuna na piscine. Mu mangaka na kukwenda kuna. Mpe mu tubaka, “Docteur Manninen, yina kele mbote ve.”

³⁵ Yandi tubaka, “Mbote mingi, Reverend Branham, yina kele mbote ve. Na yawu yinki me tadila ba docteur na beno ya Amerique yina ke katula bakento bilele mpe ke tulula bawu na zulu ya mesa, samu na kutesa sexe—organe sexuel yandi ke na yawu? Yinki me tadila baminganga na beno na ba hôpital?”

³⁶ Mu tubaka, “Lolula munu, Mpangi Manninen, Manninen, nge me tuba mbote.”

³⁷ Yinki yawu kele? Yawu ke bikalulu. Na ntangu mu vwandaka na Paris mu lungaka na mpasi kukwikila yawu, ti ba urinoire ya babakala mpe bakento vwandaka kisika mosi. Mu lungaka bakula yawu ve, ti babinkoso yina na simu ya bala-bala vwandaka ya babakala na bakento. Mu lungaka kwikila ve ti bakento ke kwendaka sukula na plage, mwana bakala mosi mpe cherie na yandi, bawu vwandaka ve na sika ya kulwatila bilele, bawu katulaka bilele ya bawu nionso tii na lele ya nsuka, na yawu bawu balulaka mikongo na bawu mpe lwataka mwa bilele mpe kwendaka kuzenga masa, kasi yawu kele mutindu yina. Bawu ke benda bukebi na yawu ve. Yawu kele kikalulu ya France.

³⁸ Na Afrique, bakento mpe babakala, ntwenia mpe nkooko, kinkonga, ke tambula na kati ya banséke. Yina zabaka ata fioti ve yinki yayi kele binkoso, to nionso yina, mpe vwandaka na nsoni ata fioti ve na ntwala ya bantu. Kasi bawu zaba ve luswaswanu. Bawu zaba kima yankaka ve. Kasi yawu kele bikalulu ya bayinsi.

³⁹ Kasi mu tubaka, “Cherie, beto ke bantu ya luswaswanu, beto kele bantu ya Yinsi yankaka. Beto ke bapaya mpe banzenza awa,

tala yina ke sala ti bima yayi kumonana ya luvunu mingi. Samu Biblia tubaka, ‘Bawu yina ke tuba mutindu yina, ke lomba, bawu ke songisa ti bawu kele bapaya mpe banzenza, bawu ke sosa mbanza yina ke kwisa.’”

⁴⁰ Bakala mosi to kento mosi na Italie, na France, na Afrique, na konso yinsi yina yankaka, yina me butukaka mbala zole na Mpeve-Santu, ke salaka bima yina ve. Bawu ke lwataka bilele yina ve. Bawu ke salaka mutindu yina ve, samu bawu kele ya Yinsi yankaka Yina Mfumu mpe Musadi kele Nzambi. Beto kele ya Zulu. Mpeve yina kele na kati ya beno, ke yangidisa luzingu ya beno. Kana beno ke ba Americain, beno ke sala mutindu ba Americain ke salaka. Kana beno kele bantu ya France, beno ke sala mutindu bantu ya France ke salaka, mpe kuvweza bayankaka. Kasi kana beno kele ya Nzambi, beno ke sala mutindu bawu ke salaka na Zulu, samu Mpeve ya beno me katuka na Zulu mpe Yawu ke yala beno.

⁴¹ Mwa kima mosi beno lunga tala. Na Masonuku, bayina sosaka Mbanza yayi ya malu-malu, salaka mambu na mutindu ya luswaswanu. Bawu tubaka ti bawu kele bapaya mpe banzenza. Kasi na lweka ya Cain, bawu me kuma babangi mpe bayina ke pesa boma. Kasi Baklisto kele bapaya mpe banzenza. Mubangi ke vwandaka na yinzo ve, yandi ke muntu yina ke pesaka boma. Kasi mupaya kele diambu mosi ya kieleka, mpe me katuka na Yinsi mosi ya kieleka mpe ke kwenda na Yinsi yankaka, ke meka na kuzwa nzila ya yinzo ya yandi, ke tuba na luzingu ya yandi ti yandi ke na kima mosi ti yandi kele ya Yinsi yankaka. Kele na kikuma mosi.

⁴² Kasi ntete bantu yina ke salaka mutindu yina, bantu yina ke lwataka bima yina, bika mu tuba na beno. Na Afrique du Sud, na ntangu mu monaka na ngitukulu bamimpani mafunda kumi na tatu, kinkonga, kubanda lubutuku ya bawu. Kumi na sambanu, kumi na nana, bana bakento ya bamvula makumi zole, bana babakala ya kukondwa ata kitini ya lele, ya kutelema kuna na poto-poto na bilungi ya bawu, mpe me kukipakula, bansende ya bambisi na bambómbó ya bawu, mpe bitini ya bayinti ke diembela na bamakutu ya bawu, mpe bakulunsi ya mikwa ya bantu to mwa bamikwa na bansuki ya bawu, meno ya bambisi ke diembela na zulu ya bawu, kinkonga mutindu bawu butukaka, mpe zabaka yawu ve. Kasi na ntangu bawu yambaka Klisto, mpe bawu bwaka na bilungi ya bawu mpe bakaka Mpeve-Santu, bawu telemaka mpe kangaka maboko ya bawu samu na kubumba nsoni ya ntulu ya bawu, na yawu bawu kwendaka ntama mpe sosaka bilele ya kulwata. Samu na yinki? Bawu kumaka bapaya mpe banzenza na yinza yayi. Alleluia! Bawu vwandaka ntama na Yandi. Yinga, tata.

⁴³ Oh, yinga, bawu mosi ke kukibokila Baklisto. Bawu ke bantu ya mabuundu. Bawu ke kwenda ntama mpe ke tuba, “Beto kele ba Methodiste. Beto kele ba Baptiste. Beto kele ba Pentecotiste.

Beto kele ba Adventiste du Septieme jour. Beto kele *yayi, yina, mpe yina yankaka.*” Yina ke kima mosi ve. Mpeve ya beno, luzingu yina ke na kati na beno, ke tindika beno mpe ke tuba na beno yina beno kele. Yesu tubaka, “Benó ke zaba bawu na bambuma ya bawu.”

⁴⁴ Dibuundu me kuma mutindu Israel vwandaka, ntete. Bawu monaka bayinsi nionso ya bamimpani kele na ntinu mosi. Nzambi vwandaka Ntinu na bawu. Mpe bawu monaka bayinsi ya bamimpani na ntinu mosi, na yawu bawu zolaka sala mutindu mosi bayinsi ya bamimpani, mpe bawu sumbaka ntinu mosi. Mpe na ntangu bawu salaka yawu, bawu kotaka na mpasi. Malembe-malembe yawu bandaka na kukota. Malembe-malembe yinza bandaka na kukota na kati na bawu. Na nsuka bawu sukaka na Achab. Ntinu mosi kwisaka pene-pene, pene-pene diaka, mpe na nsuka yawu basisaka bawu luzingu. Mpe bawu fulaka mutindu yina. Mpe na ntangu Ntinu ya kieleka kwisaka, bawu zabaka Yandi ve.

⁴⁵ Yina ke diambu dibuundu salaka. Yawu me ndimama. Benó kele awa. Yawu me ndima politique, malongi ya lukolo. Yawu me ndima ba organisation, ba societ , mabuundu ya nene, balongi ya lukumu. Mpe na ntangu Ntinu ya kieleka ke kwisa, bawu ke zaba Yandi ve, mpe bawu ke koma na kulunsi Mpeve-Santu ya kuluta nene yina kele Ntinu ya bawu. Bawu zaba Yandi ve, kasi bawu ke seka Yandi mpe ke sala nsaka na Yandi. Mutindu mosi ba Juif salaka Mesiya na bawu, dibuundu ke sala Mesiya na bawu mutindu mosi. Bawu zaba yawu ve. Bawu kele na kwikama ya kimpeve ve, samu bawu kele na kati ya buku ya bawu mpe bawu kele na, bayinzo ya nene, ke meka na kukifwanikisa na yinza. Beto me bokilama—bokilama ata fioti ve na kukifwanikisa na yinza. Beto me bokilama na kukikumusa beto mosi.

⁴⁶ Mpe, kima yina kaka kele ya mfunu mingi, na Nzambi. Mpe bubu yayi na kati ya ba evang liste yina ke tubila kubeluka ya nzutu kuna na bisika ya malongi, kele na ngwisani ve, bawu kele na kuswana. Mosi ke tuba, “Mbote, Nzambi kusakumuka, mu ke na bamafunda mingi ya bantu. Mu ke na lukutakanu ya nene kulutila yina ya beno.” Yinki luswaswanu yina ke sala? Beto kele na mosi to million mosi, yinki luswaswanu yawu ke sala? Beto ke ya kwikama na Nzambi? Beto ke ya kwikama na Ndinga ya Yandi? Beto ke kanga ntima na kumekama ya Mpeve-Santu? Ya kieleka? Tala kima ya mfunu.

⁴⁷ Kasi beto ke kakula Biblia. Mingi ya ba Pentecotiste ya beto, ke kakula, Bamalongi ya ntete ya Biblia. Kele. . . Mu zola lwadisa bansatu ya beno ve. Mu ke na yinzo-Nzambi ya munu mosi, mpe mu—mu lunga sala mutindu yina kaka, na yinzo-Nzambi ya munu mosi, samu mu ke longi Nsangu ya mbote. Kasi mafunda kumi ya ba longi ya Pentecote zaba ti kele na kima ya mutindu yina ve na Biblia mumbandu mbotika na nkumbu ya “Tata, Mwana, Mpeve-Santu.” Mu ke tula ntembe na archbishop,

to konso muntu yina, na kusonga munu wapi sika muntu mosi me bakaka mbotika na nkumbu ya “Tata, Mwana, Mpeve-Santu.” Kasi bawu ke kakula, samu ba organisation ke salaka mutindu yina. Kele na muntu mosi ve na Ngwisani ya Malu-malu, mpe bamvula nkama tatu na ntuala, na kulanda masolo, yina bakaka mbotika mutindu yankaka na Nkumbu ya Yesu Klisto. Yinki yawu kele? Organisation. Yina salaka yawu. Bawu ke kakula!

48 Mpe bubu yayi bawu ke salaka diaka ve kimbangi na babalabala. Bawu me basisa tambourin na yinzo-Nzambi. Bawu me basisa nkembo nionso na yinzo-Nzambi, mpe bakaka malongi ya seminere, malongi ya mwa nsusu ya bakala na nzonzolo ya fioti na kati ya nkangu, yina me lambama mbote-mbote na kintwadi, mpe bakento na bawu ke lwata ba kupé mpe bilele yina me kanga nzutu, mpe babakala ke nwá makaya, mpe ke bula bansaka ya mbongo mpe ke tuba mambu ya mvindu. Yawu ke nsoni na meso ya Nzambi! Mu zaba ti yawu ke ngolo mingi, kasi yawu kele ntangu samu muntu mosi kutuba diambu mosi. Bawu ke kakula, ke yambula, ke sala mambu mutindu mosi na yinza!

49 Mu ke tala ve kana mu lunga bikala munu mosi, kukonda muntu mosi kasi na Nzambi kaka, mu ke longa Kieleka ya Biblia ya Nzambi mpe ke telema samu na Yawu. Ata ti munu ke fwa, mu ke telema kaka samu na Kieleka. Ya kieleka. Beto zola Kieleka. Mu ke tesa yawu ve na dibuundu mosi, kasi mu zola tesa yawu na Ndinga ya Nzambi.

50 Kasi Delila, beno me bakula? Yandi zabaka ti Samson vwandaka na ngolo mosi. Mpe yandi zabaka ve wapi sika ngolo yina vwandaka. Yandi lungaka tuba ve yinki ngolo yina vwandaka, kasi Samson vwandaka na ngolo mosi, mpe yandi zolaka zaba yawu. Mpe, mutindu mosi Delila, yandi salaka nionso samu na kuvuna Samson na kitoko na yandi. Oh, yandi lwataka na mutindu ya yimbi mingi. Mpe yandi tambulaka na ntuala ya yandi mpe sekisaka yandi mutindu bantwenia ya bilumbu yayi, mpe—mpe nionso yina, mpe salaka kaka mutindu, kento ya pité, yandi mekaka na kuvuna Samson.

51 Yina ke mutindu yinza salaka na dibuundu. Ntangu yayi wapi Ngolo ya nge?

52 “Mbote, kana beto sala organisation, yawu ke buka Ngolo.” Dibuundu ya Catholique salaka yawu.

53 “Kasi ba Phillistin kele na zulu ya nge Samson.” Mpe Luther kwisaka.

54 Na yawu bawu salaka diaka organisation. “Kana beno kanga munu bansinga yankaka, yawu ke lembisa munu.” Bawu salaka mutindu yina.

55 “Mpe ba phillistin kele na zulu na nge, Samson.” Yinki salamaka? Wesley kwisaka mpe zengaka bansinga.

56 “Ntangu yayi nge ke kusa munu ntangu nionso. Nge zaba ve ti munu zola nge, Samson? Mbote mingi, tuba na munu masonga ya ntima ya nge.”

“Mbote mingi, beno kanga munu bansinga yankaka.”

57 “Mbote mingi, ntangu yayi beto ke sala mutindu yina.” Yinki yina? Yina ke nsinga ya denomination.

58 “Beno bika munu vwanda na kimpwanza, ti mu ke na denomination ve. Na yawu, mu ke tuba na beno ti, beno ke buka munu.” Na yawu kwisaka kuna ba Pentecotiste. Wapi Ngolo ya beno?

“Ba Phillistin ke na zulu na nge.” Mpe yandi zengaka diaka bansinga.

59 Kasi ntangu yayi yinki salamaka? Yawu bukaka ba Pentecotiste, ba Docteur ya nene ya Bunzambi samu na ba pasteur ya bawu, mwa muntu ya nene. Bawu kele kaka na mingi ya balukolo mpe kinkulu mutindu mosi ba Methodiste to ba Baptiste, to konso kima yankaka yina bawu kele na yawu. Beno kwenda na yinzo-Nzambi mpe beno lunga ve kuwa “amen,” madidi kaka mutindu kimvuka ya ba Eskimos me katuka na Pôle Nord. Madidi! Kukonda kukipé! “Mpe ntangu yayi ba Phillistin kele na zulu na nge, Samson.”

60 Ba Phillistin kele na zulu na nge, Amerique. Wapi kintwadi ya kimpeve? Wapi kintwadi ya Pentecôte? Ba Assemblée de Dieu, mpe ba Unitaire, mpe dibuundu ya Nzambi, mpe *yayi, yina, yina yankaka*, mosi na mosi na malongi ya luswaswanu, yayi na *yina*, mpe yayi na *yina*. Beto me kabwana mingi ti beto lunga kwenda na mbanza mosi samu na reveil, kana dibuundu mosi ke twadisa yawu, bayankaka ke kwenda kuna ve. Ba Communiste ke na zulu na nge, Amerique.

61 Wapi Ngolo na beto? Wapi nkembo ya beto? Yinki yawu kele? Samu beto landaka mayele ya muntu na sika ya Ngolo ya Nzambi! Samu, balongi na beto me kuma ya kulemba mpe ya kifuluka na amidon, ti bawu salaka beto organization mosi ti beto me kuma na amidon mingi mpe lulendo, ti bantu. . . Beno ke wa diaka ve kuboka na kati ya yinzo-Nzambi? Beno ke wa diaka ve muntu kudila. Bisika ya bantu ya mafwa me kulumuka na nsi. Kele na nkembo mingi diaka ve na kati ya yinzo-Nzambi. Nionso beto ke sala kele kaka kuvwanda na kilo mutindu beto lunga vwanda. Beto kele na kimpwanza ve. Beto kele ya kukanga bansinga. Diabulu, na mpeve ya yimbi ya mambu ya bilumbu yayi, me kanga dibuundu ya Nzambi ya moyo. Yina ke kieleka. Kele na Ngolo mingi diaka ve na kati ya dibuundu. Kele na kimpwanza mingi ve. Bantu ke ya kifuluka na amidon mpe kilo! Samu na yinki, Nzambi lunga kwisa na bantu ya Pentecôte, mpe kumonisa ti Yandi kele Nzambi, mpe ke ndimisa bidimbu na Yandi ya mvumbukulu ya Yandi, yawu ke nikisa bawu ve. Nkembo! Samu na yinki, yawu ke nsoni!

Mu ke tambula na bayinsi, Nzambi ke sala bimangu, ke lungisa bidimbu, mpe bantu ke vwanda, mpe, “Mbote, mu banza ti yina ke mbote. Oh, mu zaba ti yawu lunga salama.” Yawu ke nikisa bawu ve! Samu na yinki? Bawu me kangama na Delila, yinza. Bawu me kangama na miniololo.

⁶² Ntangu yayi yawu me kanga bawu, yawu me kotisa bawu na kimvuka ya bayinsi. “Ba Phillistin kele na zulu na nge, Samson.” Yinki beno ke sala na yawu?

⁶³ “Oh, beto kele na ba denomination ya nene.” Ya kieleka. “Beto ke na kimvuka ya nene kulutila yina beto me bakaka ntete ve.” Kasi wapi Mpeve? Wapi Mpeve-Santu?

⁶⁴ Yawu yina diabulu ke salaka. Yawu me kota na dibuundu. Yawu me benda dibuundu kukondwa kulemba, “Kwisa na munu, mu ke pesa nge tabernacle ya kulutila nene awa kana nge sala kaka *yayi*. Kana nge kwenda ntama ya longi ya beno yina ya fanatique, mpe beno baka muntu yayi, Docteur ya Bunzambi yina kele na bumuntu, beto ke tunga yinzo-Nzambi ya nene ya kitoko ya lukumu mpe beto ke vwanda mutindu mosi na bawu.” Nsoni na beno! Mu ke sepela kuvwanda na muntu yina zaba ve luswaswanu kati ya bambuma ya café na ya madesu, kasi yina me fuluka na Mpeve-Santu, yina ke kakulaka ve, na Ngolo ya Nzambi.

⁶⁵ Kasi yawu me kuma, oh, na amidon mingi, tii kuna mwa nsukami ya santu lunga yidika nzila na lukutakanu mpe kutuba bandinga ya malu-malu, to kuboka fioti, to kusala kima mosi, mpe bayankaka ke baluka mpe ke tala. “Yina vwandaka yinki? Mbote, mu ke kukiyufula samu na yinki? Yina lungaka vwanda kaka fanatique yina kotaka kuna na ngitukulu.” Beno zaba ti yina ke kieleka! Mwa nsukami ya santu kukota, ya kufuluka na kiesa mingi samu na kutelemisa maboko na yandi, mpe kudila mpe kupesa lukumu na Mfumu, muntu mosi kutuba “amen” na kulongama ya Nsangu ya mbote, mpe bayankaka ke baluka mpe ke tala yinki yandi me tuba. Yina kele ba Pentecôtiste. Wapi kele diambu? Beno ke baka mbandu ya ba Methodiste, ya ba Baptiste; bawu ke baka mbandu ya ba Catholique; Catholique ke baka mbandu ya difelo. Mpe, nionso kumosi, bawu nionso ke baka mbandu ya difelo! Ya kieleka.

⁶⁶ Delila me vuna beno na kati ya mabuundu ya nene, ya mbote, balongi yina me longukaka mingi, ndonga ya kulutila mbote ya bantu. “Mbote, beno zaba, *Yayi mpe yina* awa kele millionaire, kana beto lunga nata yandi na kukota na kimvuka na beto! Oh, la la!” Kana yandi me butuka mbala zole ve, na yawu yandi me lunga ve na kuvwanda kuna. Mu ke tala ve kana yandi kele na ba-million ya ba dollars. Kana yandi kele na makumi yiya ya ba Cadillac, nionso yina yandi kele na yawu, yandi lenda kaka kubutuka mbala zole, kwisa kaka na lubutuku ya malu-malu mpe kuyela na Mpeve-Santu, mpe kubasika kuna na lubutuku

ya malu-malu, miyoyo na mbómbó (beno lolula munu), ke dila mpe ke boka, mpe ke sala mutindu bawu ke sala, mpe ke zinga luzingu yina ke monisa ti yandi me baka Yawu. Amen. Yawu yina beno ke na yawu nsatu.

⁶⁷ “Samson, ba Phillistin kele na zulu na nge.” Ba Communiste kele na zulu na nge. Yinza kele na zulu na nge. Diabulu kele na zulu na nge.

⁶⁸ Bawu ke vutukisa na manima kumona Mpeve ya Nzambi ke lungisa bimangu mpe ke sala bima yina ke talisa mvumbukulu ya Yandi, bima yina Yesu silaka, bawu ke tuba, “Beno zaba, mu banza Mpangi Branham kele ya kufuluka na telepathie. Pasteur na munu tubaka ti yawu kele ya diabulu.”

⁶⁹ Nge nsukami, muntu ya luvunu, muntu yina ke zitisaka balukanu ve, ya kufuluka na bangindu ya mpamba-mpamba, beno bayimbwa-nseke na bilele ya mameme! Yesu tubaka, “Kana beno zabaka Munu beno lungaka zaba kilumbu na Munu.” Kasi beno kele na kibuka ya ba Saul yina ke meka na kusala beno mutindu yinza.

⁷⁰ Beto zola kibuka ya bantu ya Nzambi yina ke kakulaka Ndinga ve, kasi ke longa Kieleka mpe ke telema na mbotika ya Mpeve-Santu.

⁷¹ Kasi yinki yinza salaka? Yawu zengaka Ngolo na beno nionso. Nge butukaka Naziréat, Pentecôtiste, kasi ya kieleka yinza zengaka Ngolo ya beno. Ntangu yayi yawu kele kaka kilo mutindu bayankaka.

⁷² Yinki beto ke sala? Yinki lunga salama? Kele na kima mosi ya nkembo yina munu lunga banza samu na kumonisa masonuku yayi.

⁷³ Na ntangu Samson vwandaka ya kukanga na bansinga! Beto lunga vwanda na reveil ve. Beno wa mpangi ya beto ya kwikama, Billy Graham, “Reveil na bilumbu ya beto!” Wà kuboka ya Oral Roberts, “Reveil na bilumbu ya beto!” Wà bayina yankaka, “Reveil na bilumbu ya beto!” Yinki mutindu beto lunga vwanda na reveil na ntangu beto kele ya kukanga na bansinga? Beto me kanga Mpeve-Santu, na ba organisation na beto mpe binkulu, mpe beto lunga vwanda ve na reveil ya Mpeve-Santu. Amen. Mu zaba ti yawu ke sala mpasi mingi, na mwini yai ya ngolo, kasi yawu kele Kieleka. Yinki mutindu beto lunga vwanda na reveil ya Mpeve-Santu na ntangu beno ke ya kukangama mingi mpe ya kufuluka na amidon! “Na mutindu ya kinzambi,” Biblia tubaka ti bawu ke vwanda mutindu yina. “Na mutindu ya kinzambi, kasi ke manga yina ke pesa Ngolo.” Ngolo ya yinki? Ngolo ya organisation? Ngolo ya yinza? Ngolo ya dibuundu? Ngolo ya Mpeve-Santu! Yina kele kisika ya kinsweki ya dibuundu. Mpe na ntangu dibuundu ke ndima balongi yina me longukaka mingi, mpe bayinzo ya nene-nene mpe ya kitoko, na kisika ya Mpeve-Santu na mutindu ya nkulu, kuluta mbote bawu vutukisa diaka

na mwa kisika yina ya malongi. Amen. Ya kieleka. Yinki mutindu beno lunga baka reveil mosi ya Mpeve-Santu, mpe bantu ke fika Yawu mpe ke kanga Yawu mpe kele na boma na Yawu? Kele sika wapi diambu kele.

⁷⁴ “Ba phillistin kele na zulu na nge.” Kasi kivuvu mosi kaka ya luswaswanu beto kele na yawu, na ntangu Samson vwandaka na boloko. . .

⁷⁵ Yinki kima ya ntete bawu salaka na ntangu bawu kangaka yandi? Bawu kangaka yandi, ntete. Bawu basisaka ngolo na yandi, bawu zabaka kinsweki na yandi. Bawu zabaka kinsweki na yandi. Yinza zabaka kinsweki ya beno. Ntangu yayi beno bakento yina ke zengaka bansuki ya beno, yawu ke fwanana na yinza. Beno babakala mpe ke fwanana na yinza. Ya ke mbote, beno ke tuba mambu ya mvindu, mpe ke basika mpe ke nwà makaya, mpe ke basika na kento ya muntu yankaka, mpe konso kima yankaka ya mutindu yina, mwa dikopa ya kinkundi samu na kukeba kisalu ya beno. Mu lunga lala nzala mpe kudia dimpa ya kuyuma mpe kunwa masa ya kukonda sukadi, mpe kubikala bunkete mpe mpembe na ntwala ya Nzambi, na kisika ya kukakula samu na kisalu ya konso mutindu yina. Yina kele mbote. Ya kieleka. Beno vwanda ya kwikama na Nzambi.

⁷⁶ “Samson, ba Phillistin ke na zulu na nge.” Branham Tabernacle, malongi ya yinza ke kota na malembe nionso na kati na beno. Yinki yawu kele? Beno me basisa kinsweki na beno? Beno me basisa kinsweki yina Nzambi pesaka beno na ntangu beno balukaka kuna na kati ya putulu na mwa bamvula fioti me luta? Beno me bika yawu kutina ntama na kisambu ya kinkundi, ya lukumu? Yinki me kumina beno? Nzambi lunga kulumuka mpe lungisa kimangu mosi na kati ya bantu mpe kutuba na bantu binsweki ya bantima na bawu, mpe konso kima yina, mpe kubelula mbevo mpe muntu ya mpasi, mpe kulungisa bidimbu mpe mambu ya ngitukulu, mpe kulonga Ndinga na Yandi na ngolo nionso na mutindu bawu lunga longa, na Mpeve-Santu; mpe bantu ke tuba, “Mbote, mu banza yina ke mbote. Beto ke na kiese ya kuwà yawu kaka mbala mosi na mwa ntangu fioti, kana beto ke ya kulemba ve.” Yina ke Branham Tabernacle. Ba Phillistin ke na zulu na nge.

⁷⁷ Kutuba ti, na ntangu Ndinga longamaka, basantu ya nkulu fulukaka na mansanga na meso ya bawu, bawu lungaka telema mpe kutambula, ke tekita, mbala yankaka ke tuba ndinga mosi ve, bawu vwandaka kwenda mpe vutuka, mbala zole to tatu, mpe vwandaka diaka, bawu vwandaka ya kufuluka na Mpeve-Santu! Ndinga vwandaka disa bawu! “Muntu ke zinga kaka na dimpa ve, kasi na konso Ndinga yina me basika na yinwa ya Nzambi.” Ba Phillistin kele na zulu na nge, Branham Tabernacle.

Ba Phillistin kele na zulu na nge, Pentecôtiste.

⁷⁸ Ya kieleka, ba Phillistin me kanga nge, beno bayankaka, na ntangu yina beno salaka organisation na beno ya kukangama mingi, ti kima mosi ve lungaka kota kaka kana beno kele Presbyterien, Baptiste, Methodiste, Catholique, to nionso yina. Beno lungaka vukana na bantu yankaka ve.

⁷⁹ Na yawu, reveil na kilumbu na beto? Yinki mutindu beto lunga vwanda na yawu na ntangu yina ke pesaka reveil kele ya kukangama na yinza? Nzambi ke kotaka ve kisika yinza kele, beno lunga tala kaka na yina. Kana beno sala ngwisani na yinza, imene—imene. Na ntangu beno ke bika yinza kukota, beno ke sala mambu mutindu mosi na yinza, na yawu beno me suka. Kasi na ntangu beno ke zenga konso miniololo ya yinza, mpe kukwisa na Nzambi, Nzambi ke sadila beno tii kuna beno ke kwenda sakana diaka ve.

⁸⁰ Kivuvu mosi kaka mu ke na yawu na suka yayi, samu na kumonisa Nsangu, kele yayi, “Na ntangu Samson vwandaka ya kukanga na bansinga, bansuki ya malu-malu basikaka.”

⁸¹ Nzambi tindaka beto Dibuundu yankaka na ntwala ya nsuka ya ntangu, ti Ngolo ya Mpeve-Santu lunga kwisa na kati na yandi, na kumonisama ya Mpeve, mpe Marc 16 lunga fidisa Dibuundu, Actes 2:4, Actes 2:38, nionso yina ke fidisa kaka Dibuundu. Bidimbu mpe mambu ya ngitukulu ke fidisa bantumwa. Bidimbu ya nene ya mvumbukulu ya Yandi ke fidisa bawu. Na ntangu beto ke na boloko, ya kieleka Nzambi ke yedisa bansuki kisika mosi kuna, samu na lufwa ya nsuka ya nene. Mbala yankaka yawu kele nge, nkundi ya munu Muklisto na suka yayi awa, mbala yankaka yawu kele ngolo ya nge yina me banda na kuyela. Mu ke sambila ti Nsangu ya suka yayi, mpe na ntoto ya muvimba kisika wapi yayi ke kwenda, mu ke na kivuvu ti Nsangu yayi ke sadisa na kunata vitamine na nkadulu ya beno yina ke yedisa diaka Ngolo ya kimpeve na luzingu ya beno.

Bika beto niekisa bayintu ya beto mpe kusambila.

⁸² O Mfumu Nzambi, Musadi ya Zulu mpe ntoto, Yinto ya Luzingu ya Kukonda nsuka, mpe Mupesi dikabu nionso ya mbote mpe ya kimpeve, baka bandinga yayi na suka yayi mpe tula yawu na kati ya ntima, mpe losila yawu masa, Mfumu. Bika bantu kusambila samu na bima yayi, na kumonaka ti yinza ke vuna dibuundu mpe nsuka-nsuka ke zaba Ngolo ya yandi, ke zaba kisika ya kinsweki ya yandi, ke zaba wapi sika kinsweki na yandi kele, mpe ke zenga yawu bansuki. Me baka bantu yina bokaka lunungu mbala mosi, bayina vwandaka na lunungu, mpe me zenga bawu bansuki, na kubikala na yinzo na Kilumbu ya tatu na nkokila samu na kutala manaka ya television. Me basisa kiese na bantima ya bawu, mpe me pesa bawu zola ya mingi samu na yinza kulutila yina bawu ke na yau samu na Nzambi. Yandi me pesa bawu nsatu mingi samu na yinza, nsatu ya mambu ya yinza kasi bawu ke na nsatu ya Nsangu ya mbote ve. Kana orchestre ya

nene mpe bansaka kele ve, mpe kunikana ya nzutu mpe bansaka kele ve, na yawu bawu ke zola ve Nsangu ya mbote ya nkulu, ata fioti ve, yina ke nata mansanga ya kiese na kati ya moyo, yina ke vutula kubeluka ya Bunzambi, yina ke vutula makabu ya bantumwa na dibuundu, yina ke nata Klisto yina vumbukaka na lufwa, Mesiya ya kilumbu yayi.

⁸³ Kasi mutindu mosi Israel vwandaka ya kukanga na—na bantinu ya bawu, ti bawu lungaka ve kulanda Ntinu ya kieleka; mpe Ntinu ya kieleka, na ntangu Yandi kwisaka, bawu zabaka Yandi ve. Yawu ke mutindu mosi bubu yayi. O Mfumu, Ntinu ya Nkembo me monika na mutindu ya Mpeve-Santu, diaka, Mfumu, bawu ke zaba yawu ve. Bawu zaba yawu ve. Bawu ke ya kukangama mingi na organisation, ti bawu ke bakula yawu ve, samu yawu kele ve na kati ya organisation ya bawu. Mfumu, yayi kele kosalu ya diabulu salaka na bantu.

⁸⁴ Bika ti Samson ya Nzambi, bika ti kieleka yina kele na kati ya ntima, bayina kele na nsatu mpe ke dila, mpe ke lomba mpe ke kwamina, bika bawu kangama na yawu, Mfumu, tii kuna bansuki yayi ya malu-malu ke basika, tii kuna ke kwisa diaka kiese mingi ya Sion, mpe kuna ke kwisa kibuka mingi ya bantu yina lunga zaba mpe bakula, yina lunga mona Mesiya mpe Ngolo yina me bumbana na yinza, yina bawu ke bakula ve ntangu yayi. Pesa, Mfumu, ti bawu mona yayi. Samu beto ke lomba yawu na Nkumbu ya Yesu. Amen.

[Kisika ya mpamba na bande—Mu.]

. . . Ngolo na ntangu yayi,

O Mfumu, tinda Ngolo na ntangu yayi

Mpe botika konso muntu.

Bawu vwandaka na suku ya zulu,

Bawu nionso vwandaka na dibanza mosi,

Na ntangu Mpeve-Santu kulumukaka

Yina silamaka na Mfumu ya beto.

O Mfumu, tinda Ngolo ya Nge na ntangu yayi,

O Mfumu, tinda Ngolo ya Nge na ntangu yayi;

O Mfumu, tinda Ngolo na ntangu yayi

Mpe botika konso muntu.

⁸⁵ Mbala yikwa mu zola Yandi! Tinda kaka Ngolo ya Yandi! Bawu vwandaka na kati ya suku ya zulu, bawu nionso vwandaka na dibanza mosi. Yinza nionso basikaka na kati na bawu. Bawu vwandaka mpamba, mpe Mpeve-Santu kwisaka.

⁸⁶ Bubuy yayi bawu ke tuba, “Kwisa, kota na dibuundu, tula nkumbu na nge na buku. To nieka mpe tuba, ‘Mu ke ndima Klisto Mwana ya Nzambi,’ telema.” Diabulu ke salaka mutindu mosi. Ya kieleka. Diabulu bakaka mbotika na ntangu Judas bakaka mbotika. Diabulu basikaka mpe longaka Nsangu ya mbote na ntangu Judas basikaka mpe longaka Nsangu ya mbote. Kasi diabulu bakaka Mpeve-Santu ve. Yawu yina. Tala sika wapi

Ngolo yina me bumbanaka, mvumbukulu yina, yina ke kieleka, kukonda ntembe. Amen.

⁸⁷ Yandi kele awa. Mpeve-Santu yina mosi, Yina kaka vwandaka na zulu ya Mesiya, kele na zulu ya Dibuundu na Yandi. Yandi ke katuka ata fioti ve. “Mu ke vwanda na beno ntangu nionso, ata mpe na kati na beno, tii na nsuka ya yinza. Mu ke vwanda kuna. Mambu yayi mu ke sala, beno ke sala yawu diaka. Beno ke sala ya kulutila mingi, samu Mu ke kwenda na Tata na Munu.”

⁸⁸ Kasi yinza ke kakula yawu, “Oh, yina kele samu na bilumbu me luta!” Diabulu zola ti beno sala mutindu yina. Bawu zola ti beno beba. Nzambi zola pesa beno mbotika. Nzambi zola ti. . . Beno ke tuba, “Oh, mu ke kwikila ve na mambu yina nionso.” Kwenda na ntwala mpe zinga, kwenda na ntwala mpe zinga na disumu na nge, zinga na disumu na nge. Kasi tii kuna beno ke pola, tii kuna beno ke pola na bangindu na beno mosi, tii kuna beno ke pola na mvwatu na beno, mpe kuvutuka diaka mpe kubutuka diaka ya malu-malu, mpe Luzingu yina ya malu-malu ke vwanda nionso ya luswaswanu na yina kulumukaka kuna.

⁸⁹ Mbuma ya disangu ya jaune kulumukaka, yawu ke basika ya vert. Ke kulumuka ya ngolo, ya kukangama na kati, yawu ke tomboka na bulemvo mpe ke twadisama na mupepe. Oh, nkembo! Alleluia! Na ntangu mupepe ke bula yawu, mbuma lunga sala kima yankaka ve kasi kutambula, kunikana, kasi mwa—mwa kitini ya nianga, ke nikana mpe ke sepela, na yawu ke yela, ke baka kikesa yawu mosi. Yawu lunga ata fioti ve kukuma kitini ya nianga tii kuna disangu ke fwa mpe ke pola. Kaka kufwa ve; kasi kupola. Yawu lunga vutuka na manima ve, kasi luzingu ke basika kati na yawu.

⁹⁰ Mutindu mu tubaka na mwa ntangu me luta, lubutuku kele kima ya boma, ya nzanzi, ya mvindu, ya nzanzi kulutila nzanzi, kasi kuna sika wapi luzingu me vwanda. Na ntangu nge ke kudimona nzanzi nge mosi, ke kudimona Methodiste, Baptiste mpe ba credo ya nzanzi ya ba Pentecôtiste, mpe kufwa na autel, na yawu Luzingu ya malu-malu ke kota. Mpeve-Santu ke matisa nge na zulu na yawu; samu nge mona Nzambi.

⁹¹ Beto ke mona Yandi na kilumbu yina ya nkembo. Na kilumbu yina, na simu yina ya bafwa, beto ke mona Yandi. Beno ke kwikila yawu? Na kilumbu yina kuna na simu yina ya bafwa, kuna mbasi ya kiese ke vingila munu.

⁹² Mu vwandaka ya kutelema awa na nsongi ya bala-bala na mpimpa me luta, mpe mu banza ti mu monaka Rabbi Lawson ya leke. Na ntangu yandi vwandaka awa, yandi vwandaka na kikalulu ya kutandula nkawa na yandi ya nkulu mpe kubenda munu na nkingu ya yandi, pene-pene ya nkingu ya munu na nkawa na yandi, awa na chaire mpe kuyimbila mukunga yina,

“Kuna ke vingila munu . . .” [Kitini ya mpamba na bande—Mu.]
 . . .? . . .

⁹³ Kima mosi salamaka! Yawu ke basisa yinza na nganda. Mu me banda na kumona mambu ya luswaswanu. Mu ke na boma mingi mutindu bantu ya Amerique yayi ke sala, ntangu nionso, mvula na mvula, na kumonaka bakento na babakala mutindu bawu ke kudibebisa bawu mosi mpe ke kudikotisa na kati ya disumu, tii kuna munu waka yintu mpasi, mbala zole to tatu, na boma na yawu. Mazono, mu tubaka na Nzambi, “Mu ke vwanda na boma diaka ve. Ndinga na Nge tubaka ti yawu ke vwanda mutindu yina. Kasi mu ke telema na kati-kati mpe kunganina yawu, na nionso yina kele na munu.”

⁹⁴ Kilumbu yankaka, mu vwandaka na Green’s Mill, na kisika na munu ya bisambu, ntama kuna na mfinda, mu sambilaka kilumbu ya muvimba. Mpe na ngunga tatu, mwini vwandaka kudinda, mpe mu vwandaka ya kutelema kuna ke tala ntama, mu vwanda basika na kisika ya munu ya bisambu, na tala ya ditadi ya nene. Mu vwandaka ya kutelema kuna, ke tala na lweka ya Est, ke kembila Mfumu. Mpe mu lunga mona mwini ke kulumuka na manima ya bayinti na nsongi ya mongo, mutindu mu vwandaka kutala na lweka ya canyon yina yankaka, mpe matiti vwandaka mingi kuna na zulu, kaka swi na mutindu yawu lunga vwanda. Mpe mu tubaka, “Mfumu, kilumbu mosi Nge bumbaka Moïse na kati ya ditadi, mpe Nge lutaka pene-pene na yandi, samu yandi vwandaka ya kulemba mingi. Kasi Nge lutaka, yandi tubaka ti ‘yawu fwananaka na mukongo ya muntu.’” Mu tubaka, “Bumba munu na kati ya ditadi, Mfumu.” Kaka na ntangu yina, kuna na lweka na munu, kwisaka mwa Mupepe mosi ke kulumuka na kati ya matiti. Yawu kwendaka na ntwala, kulumukaka na lweka na munu, mwa Mupepe ke kulumuka, ke kulumuka na kati ya bayinti. Mu vwandaka ya kutelema kuna.

Kilumbu mosi, Nzambi kaka zaba wapi to
 yinki ntangu,
 Bapiné ya luzingu ya lufwa ke suka,
 Mu ke kwenda zinga na mongo Sion.

Kilumbu mosi na lweka yina yankaka ya
 bafwa,
 Kilumbu mosi, Nzambi kaka zaba wapi to
 yinki ntangu,
 (Yinki ke salama? Yandi ke kanga, mwa bapiné
 yayi ke baluka.) Bapiné nionso ya luzingu ya
 lufwa ke suka,
 Beto ke kwenda zinga na mongo Sion.

Kulumuka, pusu-pusu ya mawete,
 Kwisa nata munu na Yinzo;

Kulumuka, pusu-pusu ya mawete,
Kwisa nata munu na Yinzo.

Kana nge kota kuna na ntwala na munu,
Kwisa nata munu na Yinzo;
Tuba na Mpangi Bosworth, mpe bankundi ya
munu nionso, diaka,
Kwisa nata munu na Yinzo.

Kulumuka ntangu yayi... (Yandi ke
kulumuka kilumbu mosi mpe ke tombola
munu na zulu)... pusu-...
(Konso yinti ke yokama; Bawanzio ya Nzambi,
pusu-pusu ya tiya)... nata munu na Yinzo;
Kulumuka, pusu-pusu ya mawete,
Kwisa nata munu na Yinzo.

⁹⁵ Mosi ya bilumbu yayi, mosi ya bilumbu yayi na kati ya bitini
ya bantangu ya lufwa na munu, mu zola ti Yandi kwisa. Yina
kele mbote.

Mu talaka na simu ya Jourdain mpe yinki mu
monaka
Kwisa nata munu na Yinzo; (mutindu nkooko
Elie sosaka simu yina ya Jourdain)
Kibuka ya Bawanzio ke fidisa munu,
Bawu ke nata munu na Yinzo.
Kulumuka, kita, pusu-pusu ya mawete,
Kwisa nata munu na Yinzo;
Kulumuka, pusu-pusu ya mawete,
Kwisa nata munu na yinzo.

⁹⁶ Mfumu Yesu, Chauffeur ya lusakumunu ya pusu-pusu yayi,
Pilote ya kieleka ya masuwa ya nkulu ya Sion, masuwa ya
Luzingu, ke kulumuka na yinzo, na kutubaka ti, Présence na
Yandi kele awa. Mpeve-Santu yina vumbulaka Yandi na ntoni
kele awa.

⁹⁷ Na yawu bawu kabulaka ve bakalati ya bisambu, ke na
muntu yina me katuka na nganda ya mbanza yayi awa, yina
munu zaba ve, yina kele awa samu bawu sambila samu na yandi?
Telemisa maboko na beno na zulu, ti mu zaba beno ve. Telemisa
maboko na beno na zulu, ti mu zaba beno ve. Beno, beno kuna.
Mu ke kwikila ti mwa nkundi yina kele na moustache na manima
kuna, kele na bantu me telemisa maboko ya bawu na ndonga yayi
na manima. Yinga, nge, nge me telemisa diboko na nge ve? Mbote
mingi. Kuna na manima, nge, tata. Mbote mingi. Beno nionso
kele banzenza samu na munu? Yina Mfumu Yesu, Muvungi ya
mameme awa, beno ke kwikila ti bansilulu ya Yandi kele ya
kieleka? Yandi ke pakula dibuundu ya Yandi, mpe “Bisalu yina
Mu ke sala, beno ke sala yawu, diaka. Ya kulutila nene yayi beto
ke sala, samu Mu ke kwenda na Tata na Munu. Kulutila yayi!”
Benno ke kwikila yawu?

⁹⁸ Nge telemisaka diboko na nge ti nge zaba munu ve? Nge ke kwikila ti Nzambi lunga tuba na munu yina kele na kati ya ntima na nge, lunga tuba na munu kaka mutindu Yandi salaka na kento yina simbaka nsongi ya lele na Yandi? Beno ke kwikila ti Yandi kele Nganga-Nzambi ya Mbuta yina lunga simbama na nsatu ya bimbevo ya beto? Kana Nzambi tuba na munu mambu na beno, beno ke kwikila ti mu ke profete na Yandi, beno ke kwikila ti Présence na Yandi kele awa mpe samu na yinki Yandi ke pesa yawu muswa? Nge ke sambila samu na kento ya nge. Yandi kele na luketo ya kubukana, luketo ya kubeba. Yina ke kieleka. Kana yawu ke kieleka, telema. Mbote, kwenda kuta yandi, mbote. Amen.

⁹⁹ Yinki mutindu nge kuna na manima, mwa nkundi yina telemaka, yina kele na moustache? Nge ke kwikila na ntima na nge ya muvimba? Nge ke kwikila ti Nzambi lunga tuba na munu bampasi ya nge? Nge ke kwikila ti mwana na nge ke kuma mbote? Nge ke kwikila? Nge kele na mwana ya bakala, yandi kele na paralysie cérébrale. Yina ke kieleka. Nge kele ve. . . Nge ke muntu ya Kentucky. Kana yina ke kieleka, telemisa diboko na nge. Mu zaba nge ve, ya kieleka? Kana mu sala. . . Telemisa diboko na beno mutindu *yayi*, beto me zabana ve mosi na yankaka. Yina ke kieleka. Tula kivuvu na Nzambi. Beno ke kwikila? Mutindu nge ke kwikila, kwenda kutana na mwana na nge ya bakala mutindu nge ke kwikila. Tula yawu kaka na kati ya ntima na nge.

¹⁰⁰ Nani awa telemisaka diboko na yandi, ti mu zaba—mu zaba yandi ve. . . Yawu vwandaka nge? Mbote, tata, nge ke kwikila ti mu ke profete ya Nzambi? [Bakala me tuba, “Amen.”—Mu.] Nge ke kwikila, na ntima na nge ya muvimba? Nge lenda telema ve, telema kaka kuna. Mbote, tata, yinki kele mpasi ya nge, nge kele na diabete ya sukadi. [“Yina ke kieleka.”] Mpe yawu ke yangisa dikulu na nge. [“Yinga.”] Nge kele muntu ya Ohio. [“Yinga.”] Nkumbu na nge kele Mr. Miller. [“Yina ke kieleka.”] Vutuka na yinzo ya beno mpe vwanda na mavimpi ya mbote. Mbote, kwikila na ntima na nge ya muvimba. Mbote.

Beno ke kwikila na. . . Beno kwikila yawu. Kana beno lunga kwikila!

¹⁰¹ Mama yina me vwanda awa, nge telemisaka diboko ya nge? Mama ya nene, yina me lwata bamaneti, nge ke kwikila na ntima ya nge ya muvimba? Nge ke kwikila ti. . . Nge ke kwikila ti mu ke musadi ya Nzambi? Nge ke kwikila yawu? Mbote, kana Nzambi lunga tuba na munu yina kele mpasi ya nge, nge ke kwikila? Mpasi ya ntima. Mbote, telemisa diboko na nge kana yina ke kieleka. Mbote.

¹⁰² Mama yayi awa na ntwala na nge, ya kutelema. Ntima; kasi ya kieleka yawu kele meso na nge. Mu zaba yandi. Mbote, kana nge lunga kwikila!

103 Kuna na manima, bakala yina na manima kuna kele na mpasi ya ntima, diaka, mpe na kimbevo ya mpusu ya nzutu. Nge ke kwikila ti Nzambi ke belula nge? Nge ke kwikila yawu, tata?

104 Kele na bakala mosi kisika mosi kuna na manima, yina telemisaka maboko ya yandi ti yandi salaka ve. . . Mr. Schubert. Mbote, tata. Mbote, nge ke kwikila? Yawu kele samu na meso ya nge, diaka, kele yawu ve? Diaka, nge ke sambila samu na mama na nge yina me vwanda kuna na nganda. Kana yina ke kieleka, telemisa diboko na nge. Beto kele banzenza. Yina ke kieleka? Nikisa diboko na nge, beno nikisa maboko mosi na yankaka. Mbote mingi, yina ke mbote. Kana beno lenda kwikila, beno lunga kuzwa yawu!

105 Yesu Klisto yina vumbukaka na lufwa kele na kati ya yinzo yayi. Yandi ke mutindu Mosi. Yinki Yawu ke sala na beno? Beno me bika masa ya yinti ya yinza kubasisa ngolo na beno nionso? Nkembo! Mu zola lubutuku ya malu-malu! Mu zola Luzingu ya malu-malu! Mu ke tala ve mutindu Yawu ke kwisa, kana munu ke vwanda kaka saint exalté, konso kima yina. Mu ke tala ve mutindu Yawu ke kwisa, mu zola Mpeve-Santu mutindu yawu ke na munu na ntangu yayi. Mu zola keba Yawu! Mu ke na kiese na kuvwanda na Yawu kulutila bima nionso ya yinza. Amen! Beno ke kwikila yawu? Beno ke kwikila ti Yandi kele awa?

106 Na yawu, tetika maboko na zulu ya mosi na mosi. Tuba na munu kima mosi diaka Yandi lunga sala. Kima mosi. Vwanda na lukwikilu na ntangu yayi. Kwikila ti yawu ke mana.

107 Mfumu Nzambi, Musadi ya Zulu mpe ntoto, Yinto ya Luzingu ya Kukonda nsuka, mpe Mupesi ya makabu nionso ya mbote, Mpeve na Nge kele awa samu na kupakula, Mfumu, yawu ke monana mutindu ti yinzo ke pema, ke vutuka mpe ke kwenda na ntwala. Samu na yinki bantu ke bakula yawu ve, Mfumu? Bawu me—bawu me sala ngwisani na yinza, mpe me kuma madidi mpe na mambu ya nganda mpe ya kufuluka na amidon, tii kuna bawu lunga zaba Nge diaka ve? Mfumu Nzambi, bika Ngolo yayi kubula konso muntu, mpe konso muntu kubeluka, konso nsumuki kuvuluka, mpe Nzambi kubaka nkembo. Na Yesu Klisto, Mwana ya Nzambi, mu ke lomba yawu. Amen.

108 Beno ke kwikila yawu? Telemisa maboko ya beno. Beno ndima kubeluka ya beno? Nzambi kusakumuna beno. Ntangu yayi kwenda mpe baka yawu kaka mutindu beno ke kwikila, yawu ke vwanda mutindu yina. Mu ke mona ba visions ke landana na zulu yankaka. Yina ke kieleka. Mu ke vutuka diaka na nkokila yayi.

109 Kana beno kwikila ve na ntangu yayi, beno ke kwikila diaka ve. Yina ke kieleka. Yesu tubaka yawu mbala mosi, mpe bawu tubaka, “Nge kele. . . Beto zaba ti na ntangu Mesiya ke kwisa, Yandi ke tuba na beto mambu yayi.” Yandi tubaka, “Mu zaba ti Mesiya ke sala yina. Kasi Nge kele Nani?”

Yandi tubaka, “Mu kele Yandi yina.”

¹¹⁰ Na yawu yandi kwendaka nswalu na kati ya mbanza mpe tubaka, “Beno kwisa, tala Muntu Yina zaba yina mu vwandaka mpe yina mu salaka. Yayi kele Mesiya ve?”

¹¹¹ Yandi tubaka, “Mambu yayi ke salama diaka na bilumbu ya nsuka. Dibuundu ke longi Kieleka, Yawu ke telema na zulu ya Ndinga. Yawu ke sadila Misiku ya Nzambi. Yawu ke vukana na yinza ve. Mpe na nzila na Yandi mu ke kwisa mpe ke sala mambu ya mutindu mosi.”

¹¹² Kasi Yandi tubaka, “Bawu ke vwanda bantu ya kuditombola, bantu ya lufundu, bantu ke zolaka biese ya ntoto kulutila Nzambi, bantu ke waka makasi nswalu, bafundi ya luvunu, na mutindu ya kinzambi,” bantu ya bisambu mingi, ke kwenda na bayinzo-Nzambi. “Na mutindu ya kinzambi, kasi ke manga yina ke pesaka Ngolo. Kwenda ntama na bawu!”

¹¹³ Beno kibuka ya bantu, konso kisika yina beno kele na kati ya yinzo-Nzambi, yina Yandi me bokila na ntangu yayi, vision bikaka munu. Kana—kana yina vwandaka kieleka, yina mu tubaka, mpe mu zaba kima ve samu na beno, telemisa maboko na beno, yawu vwanda konso muntu yina. Na yinzo-Nzambi ya muvimba, bantu—bantu nionso. Mbote. Beno me mona? Munu zaba bawu ve, mu me monaka bawu ata fioti ve; kasi Mpeve-Santu kele awa mpe Yandi zaba bawu. Beno lunga mona ve ti yawu kele munu ve?

¹¹⁴ Beno kuwa! Kana Yandi ke pesa munu muswa samu na yawu, Yandi ke tula kivuvu ya munu na Kieleka ya Ndinga, samu Kieleka ke kwisaka kaka na Ndinga. “Konso muntu, balula ntima, mpe baka mbotika na Nkumbu ya Yesu-Klisto, samu na ndolula ya masumu, mpe beno ke baka dikabu ya Mpeve-Santu, nsilulu kele samu na beno mpe bana ya beno, bayina kele ntama, ya mingi Mfumu Nzambi ya beto ke bokila.” Beno ke kwikila yawu? Ntangu ya me kuma pene-pene.

¹¹⁵ Beto niekisa bayintu ya beto. Mu ke lombi na pasteur na kusambila na ntangu bawu ke yilama samu na mbotika. Mu banza kele na kimalu ya mbotika. Mbote.



DIBUUNDU YINA ME VUNAMA, NA YINZA KNG59-0628M
(A Deceived Church, By The World)

BANDANDANI YA DIBUUNDU

Nsangu yayi ya Mpangi William Marrion Branham, kulongamaka na Kingelesi, na suka ya Lumingu na kilumbu ya 28 ya Ngonda ya Sambanu, na mvula 1959, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org